

莫雲漢詩詞稿選錄

送程兒赴台升學，憶往日放紙鷂騎單車
之趣，賦詩八首勉之（2001年）

少日同遊樂。秋山正曙曦。蒼穹原廣大。昂首欲揚眉。

鷂放青雲際。乘風霄漢間。一絲牢在手。遐邇往猶還。

一踏齒鏈動。翩翩雙轂旋。偶當歧路悵。穩軼躡前賢。

喜今循蟻術。囊篋獨登程。即望天涯路。可曾境界明。

（《禮記·學記》：「蟻（蟻）子時術之。」喻求學如螞蟻之堆土，循步漸進，積少成多。王國維《人間詞話》：「古今成大學問大事業者，必經三個境界。『昨夜西風凋碧樹，獨上高樓，望盡天涯路。』此第一境也。」末句用此意。）

應知求道苦。天意故勞人。未得韋編絕。尼山渺若塵。

志學宜時敏。少年識漸深。汲源勤溉木。寸寸出高岑。

（《禮記·學記》：「敬孫（遜），務時敏，厥修乃來。」《幽夢影》：「少年人須有老成之識見，老成人須有少年之襟懷。」）

弦誦南投序。春明日月潭。龍潛東海遠。無礙智珠探。

網絡縱橫結。何愁兩地分。遐方勤問訊。心意託寬頻。

自題〈宋六家詞(東坡清真稼軒白石碧山玉田)述要〉

詞苑沉淪逾百年。回瀾應識六家先。浙常陽羨餘波在。放棹中流任自然。

創調何如創意高。千秋蘇曠與辛豪。襟期灑落思兼濟。復酌妍音始近騷。

君國哀思寄橘榴。六家微志足藏修。刪除釘釘存虛勁。正變剛柔自合流。

香港某龍陽僻藝人自殺，時非典型肺炎肆虐，為患全球，人心憂鬱
惶恐，兼而有之，感賦一律 (2003 年)

初開天地陰陽判。大道因循造化清。本自瑟琴諧燕婉。嗟今鳳凰亂嚶鳴。人倫既已違常軌。病疫翻隨不典型。底事塵寰多變種。可能孽報殺機呈。

(《黃帝陰符經》：「天發殺機，移星易宿。地發殺機，龍蛇起陸。人發殺機，天地反覆。天人合發，萬化定基。」)

中國國民黨主席連戰走訪大陸感賦六章

暮春三月動鄉情。白日放歌到舊京。遼鶴歸來身世換。金陵可見蔣山青。
(國民黨退守台灣，共產黨佔據大陸，兩岸分治逾半世紀。滄桑劫換，今連戰重回舊地，當有遼東歸鶴之嘆。時維二零零五年乙酉暮春。)

香到梅花嶺上頭。孤臣血淚恥輕收。南明一段興亡事。猶共秦淮碧影流。
(連戰先往南京，夜遊秦淮。南朝往跡，可在心頭?)

活馬不來買骨先。黃金台上好招延。連連統戰尋常慣。還借楚狂制一邊。
(臺灣陳水扁倡言一邊一國，今中共蓋借連戰宋楚瑜以作制衡也。「活馬」兩句，用《戰國策》燕昭王事。)

握手秦廷竟合縱。恩仇泯盡一相逢。中原劫後欣臨此。家祭毋忘告汝翁。
(連戰與胡錦濤在北京人民大會堂握手，結束兩黨敵對之狀。陸游心事，連戰得聞乎。)

不戰屈人百萬師。攻心總勝掠城池。誰將天下彌縫合。想見英雄絕代姿。
(兩黨和談，化干戈為玉帛，亦國人所望也。)

兩黨心連兩岸潮。漢魂終幸得同招。故人如苦長相憶。楊柳青時再渡橋。
(連戰以「楊柳青時憶故人」一語，結束此次行程返台。)

哀四川大地震 十八首

江川映秀妒偏招。誰把群山猛力搖。頃刻人間成地獄。花零木落鬼風蕭。

(公元二零零八年五月十二日，亦為農曆四月初八之佛誕，四川省汶川發生八級大地震，樓房倒塌，死傷枕藉，頃刻之間，頓成廢墟。其周邊之映秀、綿陽、綿竹、北川、什邡、廣元、

都江堰等地，亦受波及，摧毀嚴重。)

二

毀鄉毀校劫災侵。多難神州又陸沉。春早一場風並雪。可能天變兆天心？

(年初長江流域之一場大雪災，幾使南中國癱瘓。災荒荐至，果天變不足畏乎？)

三

天搖地動陵為谷。淚與埃塵遮滿目。四處呼嚎弔膽奔。餘魂剩魄無家宿。

四

張開慈臂覆寧馨。瓦石衝來弱體承。怕到黃泉歸餓道。血絲和乳咀邊凝。

(有母親以血肉之軀，死撐塌瓦以護手抱之嬰。嬰緊吮母乳而幸得生還，母則返魂無術。)

五

慈親顧我脫凶胎。甘乳源源續命來。尚有輪迴當報德。此生唯獨念哀哀。

(此嬰得慈母之護庇而逃出鬼門，昊天之恩，惟待來生再報。《詩經·蓼莪》：「哀哀父母，生我劬勞。」)

六

手翻頽瓦認親兒。認出親兒具具屍。還汝亭亭清白質。一回梳洗一回痴。

(父母於倒毀之校舍中，紛手挖其子女之蹤，惜挖出者皆一具具之屍骸。有母親為子女之遺體，洗抹一番，始行下葬。)

七

巨石殘垣壓似山。一身能活一肢刪。緣何天下昇平日。慘見新豐折臂顏。

(有肢體為塌石重壓者，不能動彈，救護人員唯有即場鋸肢以保命。白居易之「新豐折臂翁」，竟不幸見於今。)

八

欲崩天地蔽灰塵。一線死生看不真。擔恐拖驚逃險處。得逃險處更傷神。

九

阿母存時阿子亡。阿爺魂逝阿孫傷。今宵不見圓圓月。一片清淒對斷腸。

十

一路汶川到北川。村村戶戶瓦無全。綿陽綿竹綿綿恨。何處巴山不鼻酸。

十一

著起戎裝放下兵。衝危履險憤無名。雄師十萬從天降。不是屠城是救城。
(地震後不久，軍隊即奉命到場救災。)

十二

小隊來回拯大堆。縱然威武卻含哀。英雄枉有如山力。屍亦如山力也頹。
(災區大而死傷多，以有限之軍力，亦唯徒嘆而已。)

十三

夢囈連年夢愈糟。光明重見尚呼毛。應知救世誰為主。天視天聽自我曹。
(有傷者獲救後，頻呼「感謝黨中央」，此與三十二年前之唐山大地震，有被困瓦礫數日，獲救後第一句竟問旁人：「毛主席在北京被砸著沒有」者，如出一轍。《書經》：「天視自我民視，天聽自我民聽，」早已有「人民為大」之意矣。)

十四

不窮不苦向曾誇。棟柱居然豆腐渣。一瞬宮牆如土委。萬千嘉樹謝春華。
(中共一向標榜「再窮不能窮教育，再苦不能苦孩子。」然今次倒塌者多為學校，死傷者多為學童，蓋豆腐渣工程之貪污所致也。)

十五

幾多鬢舍痛夷平。想到秦院項火驚。朗朗書聲都絕了。終朝唯有兩風鳴。

十六

手把微光課字工。苦心毋懼壁牆壅。樑傾更有深深會。命運潛埋知識中。
(有學童被困瓦礫中，仍手持電筒看書，以增意志。)

十七

天憎盈滿怒衝泥。堰塞湖高水就低。記否橫江誇大壩。遙聞三峽有猿啼。
(山泥傾堵，形成多個堰塞湖，隨時有崩決之虞。三峽大壩，亦若類此。)

十八

天道無親混果因。降災何竟到吾民。慈悲所謂如來法。一樣昏昏墮劫塵。

己丑暮春，訪問北京大學，賦詩六章

浩蕩潮流此著先。曾歌天賦自由權。只今回首來時路。踏過霜榛九十年。
(時為五四運動九十周年。)

勿恐殘春落雪花。解知詠絮舊才華。飛來片片今何似。白色寒芒佈萬家。
(時北京到處皆飄柳絮。)

春夏之交柳絮多。紛紛竟似網張羅。為妨敏感傷呼吸。掩鼻緘唇莫便呵。
(柳絮飄來，敏感者或恐傷害呼吸器官而掩鼻掩口。)

三千年月古文章。八不登壇議改良。卻把根源加死罪。雅辭麗藻失芬芳。
(五四運動時期，胡適撰〈文學改良芻議〉及〈建設的文學革命論〉，倡「八不主義」，更謂中文為死文字、死文學云云。)

畫圖想像蘊精神。字妙文奇味愈親。右腦可能療左道。追源說法獻芻薪。
(在北京大學講「右腦與中國文字」。右腦，司圖畫、想像、感情、直覺、綜合等功能，而中國文字及中國文學，正具此等功能。)

不是迷途便左傾。新民新學苦經營。知傳薪火非容易。久立湖邊嘆未名。
(遊北大未名湖)

香港支聯會主席司徒華逝世賦詩六首 (2011 年)

稚歲遭罹苦難中。侵天砲火劫叢叢。認誰救世知民瘼。一寸春心向日紅。

伐木興壇着手揮。協同戰線好回歸。猶須待雪罌花恥。策馬馳驅在外圍。
(司徒華早年曾參與左派組織「學友中西舞蹈研究社」之活動。後主持「教育專業人員協會」，召結教師，多次與港英政府交手。伐木，《詩經》篇名，有句云：「嚶其鳴矣，求其友聲。」詩序「伐木，燕朋友故舊也。自天子至于庶人，未有不須友以成者。」又古人朝會盟誓等事，多設壇行之，而孔子曾於杏壇聚眾設教。)

一夕傳來彈火聲。燕都何忍見屠城。春心寸寸灰如死。從此回韉脫賊營。

敢忘血債敢忘悲。廿載擔承正正旗。用彼戰謀攻彼陣。一夫吶喊萬夫隨。
(六四之後，司徒華一直擔任支聯會主席，帶領群眾鳴冤。)

無端紅粉誤嘉辰。夢醒蕭然剩此身。少艾芳容悲杳杳。情深偏竟隔天人。
(司徒華與女友黃少容，本互生情愫，惜因病早逝而致天人相隔。)

江頭空望美人兮。回首荒原竦聽雞。紅欲褪時香未死。春心還願化春泥。
(司徒華有《竦聽荒雞》及《化作春泥》等遺作。其回憶錄名為《大江東去》。)

鷓鴣天 春日郊遊

踏遍江城數嫩杼。東風吹送綠年華。雛鶯囀柳如簧唱。紫燕啣泥覓舊家。村曲靜。澗邊譁。凝妝游女拍紅牙。橫舟載酒忘歸去。且醉春塘看落霞。

南鄉子 春柳

青眼欲迷時。雨濕千絲又萬絲。慣倚長亭聽客訴。相思。識盡傷心訣別辭。飛絮點春衣。低首臨風弄舞姿。惹得遊人輕折斷。腰肢。拋落陂塘逐水移。

蝶戀花 (1975年)

遍倚欄杆誰解語。立盡殘陽。正是人間暮。欲溯明河尋織女。洪潮不許浮槎去。萬葉蕭蕭何處住。一霎狂飈。吹折江頭樹。望極東邊猶未曙。西邊更是紛紛雨。

水調歌頭 楊花依東坡體(1976年)

醉眼自含媚。猶復舞妖鬢。四廂花影弄遍。鬪月傍重山。陌上香塵輕逐。澗底銀波淺浴。春去夢痕殘。風妒雨猜後。憔悴不堪攀。鴉啼處。情默默。淚潸潸。韶華已老。空有奇術駐嬌顏。生就疏狂本性。終與污泥同命。貼地怎飛還。回首章台畔。粉碎夕陽間。

金縷曲 悼甄伯俊師(1982年)

憔悴天涯客。想平生、東陵寄命。北門遯跡。忍見黃魂將喪散。天下同遭飢溺。漫翹首、霜空岑寂。赤手屠鯨思奮起。但滔滔、四海風潮激。嗟國士。幾人識。千秋窮怨無終極。付孤吟、餐英蔭柏。袖蘭芳溢。總理騷壇延一線。萃薈亞洲文伯。竟爭奈、痾沉易簣。此日雲山埋杖履。念春蹊、桃李誰培植。循古道。照顏色。

鷓鴣天 一九九四年夏，粵西北大水，百年罕見

水決西江又北江。江流湧入九迴腸。應憐野雀迷南畝。更忍哀鴻泣舊鄉。(余故鄉西江雲浮) 傾涕淚。注汪洋。浮家處處沒餘糧。抽刀欲挽滔滔勢。只恐覆舟雨打狂。

沁園春 甫逾知命，忝為人之患亦三十秋，感而賦此

半紀生涯。卅載為牛。兩鬢漸斑。昔一肩行李。高樓獨上。尋他千處。燈火闌珊。天怎亡秦。竟留殘卷。累我沉吟課字艱。今何世、問之乎者也。古調誰彈。霜嚴但覺襟單。幾時得春風渡玉關。算浮塵遮道。猖狂乞食。陰雲蔽野。努力加餐。解縛療梅。祛滌護芷。負重泥塗未許閒。且翹首、念青山鬱鬱。活水潺潺。

西江月

內地某貧困縣，有一稚兒，父早亡，母亦患末期骨癌，臨終前織就多條毛褲，一條大於一條，留與稚兒至成年。母歿，稚兒對此遺物，一臉茫然。嗚呼，人間憾事，聞之淒惻，感而為賦。撐住支離病骨。織來大小毛裳。針絲和淚萬千行。都着孤兒身上。已感三年春暖。得捱幾個秋涼。一回開篋一回傷。空念慈懷藹樣。